

ACTA DA SESIÓN EXTRAORDINARIA E URGENTE CELEBRADA POLA COMISIÓN INFORMATIVA PERMANENTE DE URBANISMO, VIVENDA, INFRAESTRUTURAS, PARQUES E XARDÍNS E MEDIO AMBIENTE O DÍA 16 DE XANEIRO DE 2013 ÁS 14:00 HORAS.

Sendo as catorce horas (14:00) do día 16 de xaneiro de 2013, reúnese en sesión extraordinaria e urgente convocada ao efecto a Comisión Informativa Permanente de Urbanismo, Vivenda, Infraestruturas, Parques e Xardíns e Medio Ambiente, coa asistencia das/os concelleiras /os que de seguido se indican.

Concelleiros/as asistentes:

Vocais:

Grupo municipal popular

M^a Eugenia Martín Vicente
Emilio Martínez Carballeira
Carmen Verde Leboráns

Grupo municipal socialista

José Manuel Miñones Conde
Isabel González Cancela

Concelleiras/os non adscritas/os

Xosé Anxo Doval Rey
Susana Mallo Redondo
Pilar Candocia Pita

Presidente: Don Alfredo Taboada Alvelo

Secretaria: Dona Rosa Ana Prada Queipo.

Asiste o señor **interventor** don José Antonio Rueda de Valenzuela.

Asiste a **arquitecta municipal** dona Marta Bellas Rodríguez.

ORDE DO DÍA:

Punto primeiro.- Ratificación da urxencia da convocatoria.

Intervén o presidente da comisión don **Alfredo Taboada Alvelo** para explicar substancialmente que a urxencia ven motivada porque o prazo para presentar o POS está a piques de rematar.

Intervén dona **Pilar Candocia Pita** para manifestar substancialmente que recibiron por parte da Alcaldía a explicación de que o POS se retrasou pola demora administrativa na elaboración do proxecto dun aparcadoiro para Aldea Nova, explicación que non lles parece suficiente para xustificar a urxencia.

Polo grupo municipal socialista se pronuncia, no mesmo sentido, don **José Manuel Miñones Conde**, dicindo que cando as cousas se programan non precisan urxencia e que o POS se convoca todos os anos.

A urxencia da convocatoria é ratificada por maioría absoluta cos votos a favor dos membros do grupo municipal popular e a abstención dos membros do grupo municipal socialista e das/os concelleiras/os non adscritas/os.

Punto segundo.- Aprobación do plan de cooperación ás obras e servizos de competencia municipal (POS) 2013.

Intervén o concelleiro don **Xosé Anxo Doval Rey** para manifestar substancialmente que houbo tempo de sobra dende o mes de decembro, no que por parte do goberno municipal se lles fixeron unha serie de propostas aos membros da oposición sobre as obras a presentar no POS 2013. O importante é decidir, xunto coas asociacións, qué obras teñen mais prioridade. Non negar que as obras propostas polo goberno sexan necesarias. E *sendo un pouco localista* ten que evidenciar que por segundo ano consecutivo as obras que se presentan ao POS son todas de Bertamiráns “para arriba”, salvo unha complementaria para un parque no Milladoiro.

Indica que como non puideron decidir precisamente o fondo do asunto, é dicir, a prioridade, vanse abster.

Polo grupo municipal socialista intervén don **José Manuel Miñones Conde** para anunciar a súa abstención e dicir substancialmente, referíndose á convocatoria dun día para outro, que por primeira vez cambian as formas, esta vez se fixo de xeito distinto pois se avisou

previamente á oposición por parte da Alcaldía, precisamente o que esta viña solicitando dende hai tempo.

Non obstante, hoxe mesmo se produciu unha modificación que non tivo tempo a revisar, polo que incide no dito anteriormente, que houbo un ano para preparar este asunto, reiterando a solicitude de que se programe mellor.

Se pronuncia de acordo co señor Doval Rey en canto á importancia de decidir a prioridade das obras conxuntamente coas asociacións, e sabendo que era en decembro cando había que decidir o POS, entendían que cando tiveron a reunión co señor alcalde e o señor García Argibay xa se chegaba tarde pois xa non daba tempo, motivo polo cal fixeron unha serie de propostas para incluír no POS en relación a obras que consideraban moi urxentes, sendo unha delas a do aparcadoiro do centro ocupacional de Aldea Nova recentemente inaugurado. Non se inclúe sen embargo outra das obras que propuxeron, o acondicionamento da rotonda do Pedregal, manifestando que quere deixar patente que as dúas rúas que van dar a esa rotonda están en moi mal estado. Continúa referíndose á rede de saneamento, considerando que se se metera agora no POS se gañaría tempo con respecto á negociación do novo contrato coa empresa adxudicataria, ao que lle contesta a concelleira de Medioambiente, Sanidade e Cultura dona **María Eugenia Martín Vicente** que o 3 de setembro se comeza un novo contrato e que as obras poden empezar o 3 de outubro, non comezando o POS 2013 como mínimo ate dentro dun ano, logo o que retrasa é o POS, non a licitación do novo contrato.

Sobre a obra do aparcadoiro que vai a Aldea Nova pregunta o señor **Miñones** se levará puntos de luz, pois no plano do proxecto non se aprecian, respondendo o señor **presidente** da comisión que si, extremo que é confirmado pola arquitecta municipal.

En canto á modificación que se fai agora da memoria se interesa o señor **Miñones** pola cantidade de 93.000 euros para obras complementarias, dicindo que se a Deputación non prioriza algunha obra se podería perder, respondéndolle dona **María Eugenia Martín Vicente** que a complementaria se adxudica coas baixas doutras adxudicacións, co cal non depende da Deputación senón do que lle quede ao concello.

Intervén o concelleiro don **Xosé Anxo Doval Rey** para preguntar se, supoñendo que o que quede para o plan complementario non chegue á cantidade de 70.000 euros prevista para a actuación sobre tres parques infantís, se pode actuar nun só deles, ou ao terse presentado como única actuación non sería posible, respondendo o señor **presidente** da comisión que nese caso habería que tramitar unha modificación.

Intervén a concelleira dona **Pilar Candocia Pita** para solicitar que conste en acta que aínda que a valoración dos asuntos sexa dun ou outro xeito é agradable enterarse con anterioridade para poder planificar, sobre todo porque hai moita xente que ten que pedir o tempo no seu traballo.

Rematadas as intervencións o asunto é ditaminado favorablemente por maioría simple cos votos a favor de don Alfredo Taboada Alvelo, dona María Eugenia Martín Vicente e dona Carmen Verde Leboráns e a abstención de don José Manuel Miñones Conde, dona Isabel González Cancela, don Xosé Anxo Doval Rey, dona Susana Mallo Redondo, dona Pilar Candocia Pita e don Emilio Martínez Carballeira.

Intervén co concelleiro do grupo municipal popular don **Emilio Martínez Carballeira** para facer unha **explicación de voto** respecto da súa abstención. Di que o motivo é que nunha reunión previa se acordara incluír unha obra en Tapia como prioritaria, e despois se enterou das obras que se levaron como proposta á Xunta de Voceiros catro ou cinco días despois, co que se sorprendeu e se sentiu moi molesto -con todos os seus respectos á oposición- de que ésta se enterara da relación de obras antes que membros do equipo de goberno. Indica que se sentiu completamente enganado, que non se lle dixo para nada que esa obra non se ía incluír, e que tamén houbo un aumento da cantidade para gastos correntes da que se enterou hoxe.

E non habendo mais asuntos de que tratar o señor presidente da por rematada a sesión ás catorce horas e vinte e cinco minutos do día de referencia de todo o que eu como secretaria certifico.